



**ӨМНӨГОВЬ АЙМГИЙН
ИРГЭДИЙН ТӨЛӨӨЛӨГЧДИЙН ХУРЛЫН
ТЭРГҮҮЛЭГЧДИЙН ТОГТООЛ**

2018 оны 03 сарын 28 өдөр

Дугаар 45

Даланзадгад

Журам шинэчлэн батлах тухай

Монгол Улсын Засаг захиргаа, нутаг дэвсгэрийн нэгж, түүний удирдлагын тухай хуулийн 18 дугаар зүйлийн 18.1.3 “к”, Төрийн болон орон нутгийн өмчийн тухай хуулийн 77 дугаар зүйлийн 77.1 дэх заалтыг тус тус үндэслэн аймгийн иргэдийн Төлөөлөгчдийн Хурлын Тэргүүлэгчдээс ТОГТООХ нь:

1. “Орон нутгийн өмчийн оролцоотой хуулийн этгээдэд Төрийн өмчийн төлөөллийг хэрэгжүүлэх” журмыг хавсралтаар шинэчлэн баталсугай.

2. Энэхүү журмын хэрэгжилтэд хяналт тавьж ажиллахыг аймгийн Засаг дарга /Н.Наранбаатар/-д даалгасугай.

3. Уг тогтоол батлагдсантай холбогдуулан аймгийн иргэдийн Төлөөлөгчдийн Хурлын Тэргүүлэгчдийн 2008 оны 08 дугаар тогтоолыг хүчингүй болсонд тооцсугай.

ХУРЛЫН ДАРГА



Х.СУГИР

ОРОН НУТГИЙН ӨМЧИЙН ОРОЛЦООТОЙ ХУУЛИЙН ЭТГЭЭДЭД ТӨРИЙН ӨМЧИЙН ТӨЛӨӨЛЛИЙГ ХЭРЭГЖҮҮЛЭХ ЖУРАМ

Нэг. Нийтлэг үндэслэл

1.1. Энэхүү журмын зорилго нь орон нутгийн өмчийн оролцоотой хуулийн этгээдэд Төрийн өмчийн төлөөллийг хэрэгжүүлэхтэй холбогдсон харилцааг зохицуулж, Төрийн өмчийн төлөөллийг хэрэгжүүлэх этгээдэд тавих шаардлага, түүний эрх, үүрэг, хариуцлагыг тодорхойлоход оршино.

1.2. Орон нутгийн өмчийн оролцоотой хуулийн этгээдэд дараах хуулийн этгээд хамаарна. Үүнд:

1.2.1. Нийт гаргасан энгийн хувьцааг 100 хувь Төр эзэмшдэг компани.

1.2.2. Нийт гаргасан энгийн хувьцааны тодорхой хувийг Төр эзэмшдэг, энэ журмын 1.2.1-д зааснаас бусад компани.

1.3. Орон нутгийн өмчийн оролцоотой хуулийн этгээдийн хувьцаа эзэмшигчийн эрх, үүргийг Төр тухайн хуулийн этгээдийн Хувьцаа эзэмшигчдийн хурал, Төлөөлөн Удирдах Зөвлөлд Төрийн өмчийн төлөөллийг хэрэгжүүлэх гишүүнээр томилсон этгээдээр дамжуулан хэрэгжүүлнэ.

Хоёр. Төрийн өмчийн төлөөллийг хэрэгжүүлэх этгээд, түүнийг томилох

2.1. Орон нутгийн өмчийн оролцоотой хуулийн этгээдэд Төрийн өмчийн төлөөллийг хэрэгжүүлэх этгээдийг томилохдоо дараах зарчмыг баримтална. Үүнд:

2.1.1. Тухайн хуулийн этгээдийн үйл ажиллагааны чиглэл, онцлогийг харгалзах.

2.1.2. Тухайн хуулийн этгээдийн үйл ажиллагааны чиглэл, хамаарах салбарын Төрийн Захиргааны төв байгууллагын төлөөллийг оролцуулах.

2.1.3. Шаардлагатай тохиолдолд бусад Төрийн Захиргааны байгууллагын төлөөллийг хангах.

2.2. Төрийн өмчийн төлөөллийг хэрэгжүүлэх этгээд Төрийн болон орон нутгийн өмчийн тухай хуулийн 21 дүгээр зүйлийн 5 дахь хэсэгт заасны дагуу дараах болзлыг хангасан байна. Үүнд:

2.2.1. Тухайн хуулийн этгээдийн Төлөөлөн Удирдах Зөвлөлийн гишүүний үүргийг гүйцэтгэхэд шаардагдах мэдлэг, чадвартай.

2.2.2. Тухайн хуулийн этгээдийн Төлөөлөн Удирдах Зөвлөлийн гишүүн байхад ашиг сонирхлын зөрчил үүсэхгүй байх.

2.2.3. Төрийн Захиргааны албан хаагч болон Нутгийн Өөрөө Удирдах Ёсны байгууллагын төлөөлөл байх.

2.2.4. Санхүүгийн зохицуулах хорооноос эрх олгосон сургалтын байгууллагаас зохион байгуулсан компанийн засаглалын сургалтад хамрагдаж, гэрчилгээ авсан байх.

2.2.5. Хувийн ашиг сонирхлын урьдчилсан мэдүүлэг гаргасан байх.

2.3. Орон нутгийн өмчийн оролцоотой хуулийн этгээдэд Төрийн өмчийн төлөөллийг хэрэгжүүлэх этгээдийг томилох шийдвэрт Төрийг төлөөлөн эзэмших хувьцааны хэмжээ, хувьцаа эзэмшигчийн хувьд эдлэх эрх, явуулах үйл ажиллагааны чиглэл зэргийг зааж болно.

2.4. Орон нутгийн өмчийн оролцоотой ХК, ХХК-ийн Төлөөлөн Удирдах Зөвлөлийн гишүүдийг Хувьцаа эзэмшигчдийн хурлаар, Төлөөлөн Удирдах Зөвлөлийн даргыг Төлөөлөн Удирдах Зөвлөлийн гишүүдээс нийт гишүүдийн олонхийн саналаар томилж, чөлөөлнө.

2.5. Орон нутгийн өмчийн оролцоотой хуулийн этгээдийн Хувьцаа эзэмшигчдийн хурал болон Төлөөлөн Удирдах Зөвлөлд Төрийн өмчийн төлөөллийг хэрэгжүүлэх этгээдийг томилох саналыг Орон нутгийн өмчийн газар аймгийн Засаг даргад танилцуулан аймгийн иргэдийн Төлөөлөгчдийн Хурлын Тэргүүлэгчдэд танилцуулан шийдвэрлүүлнэ.

2.6. Орон нутгийн өмчийн оролцоотой хуулийн этгээдийн Хувьцаа эзэмшигчдийн хуралд Төрийн өмчийн төлөөллийг хэрэгжүүлэх этгээдийг тухайн хуулийн этгээдийн Төлөөлөн Удирдах Зөвлөлд төрийн өмчийн төлөөллийг хэрэгжүүлж байгаа этгээдээс томилно.

2.7. Орон нутгийн өмчийн газар нь энэ журмын 2.7-т заасны дагуу Төрийн өмчийн төлөөллийг хэрэгжүүлэх этгээдийг томилох саналыг боловсруулахдаа тухайн асуудлыг эрхэлсэн Төрийн Захиргааны төв байгууллагын саналыг авч, холбогдох Төрийн байгууллагын төлөөллийн зохистой харьцааг харгалзсан байна.

Гурав. Төрийн өмчийн төлөөллийн хэрэгжүүлэх этгээдийн эрх үүрэг

3.1. Төрийн өмчийн төлөөллийг хэрэгжүүлэх этгээд нь Төрийн болон орон нутгийн өмчийн тухай хуулийн 21 дүгээр зүйлийн 4 дэх хэсэгт заасны дагуу дараах эрх, үүргийг хэрэгжүүлнэ. Үүнд:

3.1.1. Хувьцаа эзэмшигчдийн болон Төлөөлөн Удирдах Зөвлөлийн хуралд таслах эрхтэй оролцох.

3.1.2. Төрийн өмчийн төлөөллийг хэрэгжүүлж байгаа хуулийн этгээдийн эд хөрөнгийг үр ашигтай захиран зарцуулах талаар санал боловсруулж орон нутгийн өмчийн газарт оруулах.

3.1.3. Орон нутгийн өмчийн хувьцааг эзэмших эрхийг хэрэгжүүлж байгаа этгээдээс баталсан удирдамж, заавар, олгосон эрх хэмжээ хүрээнд төрийн өмчийн төлөөллийг хэрэгжүүлэх.

3.1.4. Хуульд заасан бусад эрх, үүрэг.

3.2. Энэ журмын 3.1.3-т заасан удирдамж, заавар нь хуульд нийцсэн байна.

3.3. Хуулийн этгээдийн хувьцааг Төр дангаар эзэмшдэг тохиолдолд тухайн хуулийн этгээдийн үйл ажиллагааны онцлогтой уялдуулан Төрийн өмчийн төлөөллийг хэрэгжүүлэх этгээдийн эрх, үүргийг хуулийн этгээдийн дүрмээр тусгайлан тогтоож болно.

3.4. Төрийн өмчийн Төлөөллийг хэрэгжүүлэх этгээд орон нутгийн өмчийн оролцоотой хуулийн этгээдийн Төлөөлөн Удирдах Зөвлөлийн хуралд биечлэн оролцоно.

3.5. Төрийн өмчийн төлөөллийг хэрэгжүүлэх этгээд нь орон нутгийн өмчийн хувьцааг эзэмших эрхийг хэрэгжүүлж байгаа этгээдээс баталсан удирдамж, зааврын биелэлтийг орон нутгийн өмчийн газарт танилцуулна.

3.6. Төрийн өмчийн төлөөллийг хэрэгжүүлэхээр томилогдсон этгээд Төрийн болон орон нутгийн өмчийн тухай хуулийн 21 дүгээр зүйлийн 12 дахь хэсэгт заасны дагуу цалин хөлс авна.

3.7. Энэ журмын 3.6-д заасан цалин хөлсний хэмжээг тухайн хуулийн этгээдийн үйл ажиллагааны хүрээ, санхүү, эдийн засгийн байдлыг харгалзан Хувьцаа эзэмшигчдийн хурал тогтооно. Цалин хөлсний хэмжээ нь хөдөлмөрийн хөлсний доод хэмжээг 2 дахин нэмэгдүүлснээс ихгүй байна.

3.8. Энэ журамд заасны дагуу Төрийн өмчийн төлөөллийн хэрэгжүүлэхээр томилогдсон Төрийн Захиргааны албан хаагч 2-оос илүү Төрийн болон орон нутгийн өмчийн оролцоотой хуулийн этгээдийн Төлөөлөн Удирдах Зөвлөлд орж ажиллахыг хориглоно.

Дөрөв. Орон нутгийн өмчийн газрын чиг үүрэг

4.1. Орон нутгийн газар нь Төрийн өмчийн төлөөллийн талаар дараах чиг үүргийг хэрэгжүүлнэ. Үүнд:

4.1.1. Орон нутгийн өмчийн оролцоотой хуулийн этгээдийн Хувьцаа эзэмшигчдийн хуралд Төрийг төлөөлж оролцох этгээдийг томилох саналыг боловсруулах.

4.1.2. Энэ журмын 4.1.1-д заасан этгээдэд Хувьцаа эзэмшигчдийн хурлаар хэлэлцэх асуудал бүрээр гарах шийдвэрт өгөх саналд удирдамж, заавар өгөх, шаардлагатай гэж үзсэн тохиолдолд хэлэлцэх асуудлын талаар аймгийн иргэдийн Төлөөлөгчдийн Хурлын Тэргүүлэгчдээс тодорхой чиглэл авах.

4.1.3. Орон нутгийн өмчийн оролцоотой хуулийн этгээдийн Төлөөлөн Удирдах Зөвлөлийн бүрэлдэхүүнд Төрийн мэдлийн хувьцааны хэмжээнд тохирох тооны гишүүдийг томилох саналыг боловсруулах.

4.1.4. Энэ журмын 4.1.3-т заасан этгээдээр дамжуулан Төрийн, орон нутгийн бодлогыг хэрэгжүүлэх арга хэмжээ авч, тухайн хуулийн этгээдийн Төлөөлөн Удирдах Зөвлөлийн бүрэн эрхийн хүрээнд хамаарах асуудлаар санал оруулах.

4.1.5. Энэ журмын 4.1.3-т заасан этгээдэд Төлөөлөн Удирдах Зөвлөлийн хурлаар хэлэлцэх асуудал бүрээр гарах шийдвэрт өгөх саналд удирдамж, заавар өгөх, шаардлагатай гэж үзсэн тохиолдолд хэлэлцэх асуудлын талаар аймгийн иргэдийн Төлөөлөгчдийн Хурлын Тэргүүлэгчдээс тодорхой чиглэл авах.

4.2. Төрийн өмчийн төлөөллийг хэрэгжүүлэх этгээдэд удирдамж болон заавар өгөх, Төрийн өмчийн төлөөллийг хэрэгжүүлэх этгээдийн ажлын тайлан, төлөөлөл хэрэгжүүлсэн байдлыг дүгнэж аймгийн иргэдийн Төлөөлөгчдийн Хурлын Тэргүүлэгчдэд танилцуулна.

4.3. Орон нутгийн өмчийн газар нь орон нутгийн өмчит болон орон нутгийн өмчийн оролцоотой хуулийн этгээдийн тайлан тэнцэл, мэдээ, судалгаанд үндэслэн тэдгээрийн менежментийн байдал, эдийн засгийн үндсэн үзүүлэлтүүд, төсвийн өмнө хүлээсэн үүргийн биелэлтэд бүтэн жилээр үнэлэлт дүгнэлт өгч, цаашид авч хэрэгжүүлэх арга хэмжээний төсөл боловсруулан аймгийн иргэдийн Төлөөлөгчдийн Хурлын Тэргүүлэгчдэд танилцуулан, шийдвэрлүүлнэ.

Тав. Хариуцлага

5.1. Орон нутгийн өмчийн оролцоотой хуулийн этгээдийн Хувьцаа эзэмшигчдийн хурал, Төлөөлөн Удирдах Зөвлөлийн хуралд оролцох Төрийн өмчийн төлөөллийг хэрэгжүүлэгч этгээд нь орон нутгийн мэдлийн хувьцаа эзэмшигчээс өгсөн удирдамж, зааврын дагуу ажиллана.

5.2. Хуульд нийцсэн удирдамж, зааврыг зөрчсөн буюу зохих ёсоор биелүүлээгүй нь энэ журмын 5.1-д заасан этгээдийн Төрийг төлөөлөх эрхийг дуусгавар болгох үндэслэл болно.

5.3. Төрийн өмчийн төлөөллийг хэрэгжүүлэх этгээд хүндэтгэн үзэх шалтгаангүйгээр Төлөөлөн Удирдах Зөвлөлийн хуралд биечлэн оролцоогүй, Төрийн өмчийн төлөөллийг хэрэгжүүлэх үүргийг зохих ёсоор биелүүлээгүй бол тухайн сарын цалин хөлсийг олгохгүй.

5.4. Төлөөлөн Удирдах Зөвлөлийн хуралд хүндэтгэн үзэх шалтгаангүйгээр 3 болон түүнээс дээш удаа оролцоогүй Төрийн өмчийн төлөөллийг хэрэгжүүлэх этгээдийн Төрийг төлөөлөх эрхийг дуусгавар болгоно.

5.5. Орон нутгийн өмчийн газраас баталсан удирдамжийн дагуу Хувьцаа эзэмшигчдийн хурлын болон Төлөөлөн Удирдах Зөвлөлийн шийдвэрээс үүсэх үр дагаврыг орон нутгийн өмчийн төлөөллийг хэрэгжүүлэх этгээд хариуцахгүй.

5.6. Энэ журмын 5.1-д заасан хуульд нийцсэн удирдамж, зааврыг зөрчсөн, удирдамж, заавар авахгүйгээр Хувьцаа эзэмшигчдийн болон Төлөөлөн Удирдах Зөвлөлийн хуралд оролцож, шийдвэр гаргасны улмаас учирсан хохирлыг тухайн буруутай этгээд хариуцан арилгана.

Зургаа. Бусад зүйл

6.1. Орон нутгийн өмчийн оролцоотой хуулийн этгээдэд Төрийн өмчийн төлөөллийг хэрэгжүүлж байгаа этгээд тухайн хуулийн этгээдийн үйл ажиллагааны талаар жил бүр тайлан гаргаж, орон нутгийн өмчийн газарт хүргүүлж, дүгнэлт гаргуулна.